

A tûzer, Pinotchèt, Pâpion, Nèyôl.

I xhèneréve k' asteure, avou l' djustisse, k'ça fuche d' l' ôte costé del Grande Basse, è l' France odobén amon nos ôtes, si on vout ièsse lèyî trankile i gn'a k'a rèxhe dins ène pitite tchèrète...

*

Studiaedje dès linwes.

On nos ripète èt racapète ki nos èlèves sus l' soû d' l' Univièrsité, ni sont nén capâbes, après awè passé chîj ans èt 4 eûres samwinne di studiaedjes, di s'disbrouyî dins on ètrandjîr lingaedje èt ki lzeu faut co bén tot è l' françès. On nos ripète èt racapète ètou k'i nos lès fauréve plonker à make dins l' linwaedje di lz'ôtes èt lès î nèyî po k'ça vaye mia. Èt après ? Euu...eu..eu, pus rade èt avant ça ? N'nos fauréve-t-i nén awè po comincî lès maïsses ki vont avou ? Èt c' n'èst todi k' lès deus *mèssès* linwes do payis. Po c'ki èst dès *pitites*, èvou èstanne ? Combén d' tîmps fauréve-t-i po s' rimète dsus lès scayons del chaûle ? Dèdja k'a, kwè (contant laudje) à on ptit mile, on s' rote l'on l' ôte dsus lès pîds po sayî d' griper dsus l' prumî èt n'nén volu s'arindji po sayî d' ariver à on comon môde walon di sicrfjhaedje...

*

Savîz k'lès bananes sont malâdes èt k'si ça continuwe i n'd'ara pus pont dsus l' tête dins ène sakwè come dîj ans didci ? Bon, si vèci i gn'ara todi k' *Mitchète* à n' pus sawè s' è



gâdi, ça va èto doner dès miyards di djins sins pus rén à mindjî. Parètréve k'po s' arindjî lès bidons i fauréve passer pa lès OGM mins ki l' tîmps riskêye di manker. Esseki lès vèts on l' pîce po mète au trà odobén èsse k'on nos raconte (co) dès couyes ?

*

Tot câzant d'zèles v'la-t-i nén k'on doneu di siminces à l' BdF (Banke do Foute) vént di s' fé calindjî po lî fé payî ène pinsion d' amougnaedje à ène dissipe di Lèsbos k'a gangnî ène tèrcèle do fait d'sès dnêyes è burètes ! Ewousse k'on va d' aler ? Dèdja ki xhèneréve k' lès èfants nén mètus dsus l' voye del boune manîre on branmint pus d' tchances (?) ki l'z-ôtes d' ièsse malâdes...

*

Dèl Rayèl del cauve, tot passant pa l' Italîye, on arive à l' mêcopète do meur di Chine. On î clone èto. Nén co Mao (è l' Russîye on a dèdja djôzé d' Lénine) mins on saye avou

dès pandas djèyants ki l' race toûne à rén. Po z' ariver à z-è aarder sakants, i z-ont pris ène pîcète d' on panda èt l' sititchî dins on ovaedje di robète, k'a stî mètù à pwarter pa/dins one oursonne. Kand on pinse ki po fé Frankenstein i n'faléve fé djusse ki l' costri.

*

Do costé d'Lîdje, on poréve bin lèyî s'distinde lès hôts fornias. L' fyêr n'va pus polu s'î stinde. Arcèlâr, maugré sès ègadjmints vout lèyî tot tchèr èt mète insi dsus l' voye sakants bèlès bènes di chômeus. Font-i fé dès waches ? Èt lès soudârdès k'on vouvéve nos mète dins lès reuves à l' place del police k'a ds ôtes cayèts a rimpli ?

*

Lès tchivaus d' bwès n' pîtenut pus.

C'èst drole, lès inocints ont todi dès rûjhes à ièsse èscuzés èt pardonés. I lzeu faut todi tchèr èt vilin payî d'avance. Parèt k' Dotrà, li, n'a rén payî à l' Pîre ki l'a sotènu sèt ans au lon. L' novia, ça va-t-i co ièsse "pro dèyo" ? D' on ôte costé, èsse ki Karine, lèye, va-t-i falu k' èle è nn'd' ale pwarter dès cârs au Molén, li k'a stî lomé pus wôt pa on favorâbe vént ? L' èst vraîy k'ça rapwate todi mia d' ièsse do costé do mantche. Dès bèlès comissions avîne mostré dès djints do dwèt èt, po fini, c' n'èst k'li (l' dwèt) k' on a riwêti èt n'nén volu d' aler vîre pus lon.

Après l' dicâsse ?

“Li lune ? Por vos dji m’va l’ coude” avêve-t-i dit à l’ pitite bauchèle. Au mitan dèl nût il a vnu grèter à s’fènièsse èt l’ dispièrter.

- Vinèz don vîre.

Èle a rèxhu fou èt l’ xhûre à l’ intrêye dèl grègne.

- Riwètèz.

Dins on saya plin d’eûwe bagnéve li lune ! Radimint l’ valèt a mètu ène loque dissu. – Vinèz.

Èbâbîye, l’ bauchèle, sins s’ ritoûner ni lèver s’ tièsse, l’a shûvu dsus lès fouîrs. A l’ pikète do djoû, s’ rècrèstant, il a pètè èvoye. Volé sus s’panse, l’ saya s’ avêve vûdf. Di c’ djoû là, l’ comére n’a pus mây dovièt sès ouys. Comint arîz volu k’ dins cès tîmps là, è nos campagnes, ène aveule trove ène sakî po l’ marier ? Chîj mwès pus târd on l’ ritrovéve mwate, grosse, à l’ bate, dins lès euwes dèl Bième.

*

Èstèz tro pansu ?

On vos va ptète trover one novèle drogue po vos rinde mwins spès. On biolodjisse di Harvard a mètu on nom dsus one banslêye di djînes di ronds wèrbias ki sèrîne loyîs à l’ amoncèlaedje dèl crauches. Vos riskèz don k’ on vos fêye bin rade mognî dèl rikètes di vièrs po vos rinde mwins gros. Bon apè-vos !

*

Co ène bèle discoviète !

Dès rancheus amèrikins s’ sont rindus conte ki l’ ovaedje d’ ène feume k’a rilopé s’ sou d’ foute èt s’ è årder l’ pus veyant dèl

S. A. Miroiterie N. HIERNAUX, Fils et C^{ie}

Rue de l’Eglise

CHARLEROI

Carnet remis le
Boekje overhandigd den

Ce carnet doit être remis au bureau 48 heures avant la paie sinon il sera considéré comme perdu et remplacé aux frais du titulaire.

Dit boekje moet 48 uren vóór elke betaling van het loon in het Bureau afgegeven worden zoodat het aanschoonwd worden als verloren en vervangen op de kosten van den titularis.

nèviyeus dwèt s’assatchî dins l’ utèrus po divnu on bia èfant. Parètréve ki ça n’ èst nèn si auji k’ça passe k’i s’ ritrove à roler come ène bole dins on richot d’ sirôpe èt k’ c’èst po çoula k’ i gn’a dèl rataedjes. Asteure i vont s’assayî à rinde l’ voyaedje mwins ridant èt studiyî d’ près l’ chirou d’ Lîdje ki, li, aclape bin.

*

Come li Nautilus ?

L’ batia do nèviyeu burton Olivî d’Kèrsâzon, ki saye di fé au pus rade li toû d’ nosse bole, s’a fait ataker pa ène grosse bièsse dèl mers. On monsse marin à longus brès s’î a, si-ya, aclapé. Si èle n’a pont lèyî d’ suçons èt l’ Olivî pont pris d’ foto, on va dimèrer à s’ dimander si c’n’èst nèn one crake boune pou lès Moncrabaus. Faut dîre ki l’ batia boutè dins ène coûsse ki s’ lome Trofêye Djulot Verne !

*

Vola on “Carnet d’ Salaire” d’ avant 40 (329 Fr. po 48 djoûs d’ bouye). Il èstève bilinwe. Audjourdu gn’a co on curé ki...

*

L’ ADN (DNA), comint è cauzer è walon ?

L’ *Deinococcus* è-st-ène bactèrêye k’èst fwate assez po surviker à ène bombe atomike. Cite mili-mili ptite bièsse di *D. radiosurviveuse* è-st-a minme di mète s’n’ ADN à iute d’ène atake 3000 pus tigneuse ki l’ cine ki vos, o minme mi, porîz supwarter. Po fé coût, èle arive à s’ fé on ania autoû di s’ nuke d’ ADN èt insi l’ bèn protêdjî. Nos Spèrmatozouyeus on trové ki l’ foute di l’ ome a èto c’ cougne là d’ anias dins sès adjinsnaedjes èt k’on poréve don è profiter. Dîci k’on arive à nos fé surviker à on atomike pètlaedje... C’ n’ èst nèn po dimwin. Ptète bèn ki nos fauréve ratinde sakants miyons d’ anêyes come lès *D. radioadeurîyes*.

Noerspene (10)

Noerspene a fait l' conxhance da Pwèlèlêr, vinu d' bèn lon s' èdwarmu dins on trà au mitan dès bwès d' Walonîye.

Pwèlèlêr a fwim. S' boutroule grûle. "Shûvèz-m' don, dji m' va vos trover d' l' amougnî, lî a dit Noerspene, dins l' vichnauve i gn'a pont d' âbe à z' avizances, ni d' bouxhnisses à boukètes mins i m'xhène awè vèyu on cûtèpeurî. C' èst bon èt ça vos rinêri lès boyas k' on tro stî strindus."



Èwou alanne ritrover nos novias soçons ? A shûre...